

四庫全書

集部

欽定四庫全書

集部

明文海卷四百五十

詳校官起居注事臣顧宗泰

主事銜臣徐以坤覆勘

總校官庶吉士臣倉聖脉

校對官中書臣王璫

謄錄進士臣王天祿

欽定四庫全書

明文海卷四百五十

餘姚黃宗義編

墓文二十二

名臣

故太子太保吏部尚書贈特進光祿大夫太保謚

忠肅王公神道碑銘

彭時

公諱翔字元舉姓王氏其先世家灤州自公之父避元季兵亂徙居滄州之鹽山故今為鹽山人公生有異徵

氣清質秀甫十歲能讀書父即勉以仕進克自勤勵學
遂有成永樂乙未登陳循榜進士二甲第一名改庶吉
士甲辰授大理寺左寺正因註誤左遷行人司行人宣
德丙午用廬陵楊文貞公荐陞行在山東道監察御史
當是時任風紀者多事矯激惟公謹重達大體上下賢
之乙卯陞都察院右僉都御史正統丙辰奉勅鎮守江西
政不苛刻吏民畏愛未幾往浙江除土豪理鹽法能聲
大著己未四川松潘番賊為患命將往征以公參贊軍

務公欲懷以恩信有來降者即以所賜白金寶楮易牛
酒犒之番酋商巴感悅率生番來歸受約束者一十八
寨邊境以寧辛酉出鎮陝西飭兵備壬戌往遼東提督
軍務時遼東守將屢失機朝廷以為憂特簡任公且授
以便宜之權公至守將以下庭參公詰責玩寇失機故
將斬之再三哀請乃已於是官軍咸股慄莫敢不用命
逾月躬出巡邊治障塞嚴斥堠仍簡閱戍卒更老弱賑
貧窮配鰥寡俾成室家人人感激其治訴訟專行贖罪

法雖人命亦然曰償命無益死者之家而財或足以濟用故行之不疑有指揮孫璟者因漏關鞭戍卒至死其妻女哭之相繼死他卒被鞭者訴璟殺一家三人公判曰甲死以罪妻女死於夫非殺也其令璟償塋埋費璟後為將有名非公優容不及此癸亥陞左副都御史丁卯率師出境破敵有功陞右都御史己巳陞左都御史是年秋西邊額森分衆寇廣寧公下令堅壁清野以困之敵乃遁去公在遼東十數年勤訓練廣儲蓄食足兵

疆為諸邊最其拔用將校如施聚焦禮輩皆以勇略知名亦非他邊所有也綏懷東陞女直恩威兩盡往來朝貢者無不惕威而感德景泰壬申召理都察院事尋加太子太保會廣東西賊寇擾攘兩鎮將官互相觀望不即捕朝廷命公總督兩廣軍務公至推誠撫諭蠻夷向化思恩知府岑瑛土官也屢有勞効或疑其反側公令瑛領兵屯桂林聽調人言乃息其他土官有爭職者公度勢量情予奪得宜人心帖服癸酉少傅王文端公以

清德雅望居吏部年且老矣朝廷思得剛明果斷者以濟之乃召公還命以太子太保兼吏部尚書士夫以得人相慶乙亥公年踰七十乞致仕不允已而乞歸展省又不允命有司為公起第于縣郭西蓋以慰其心也公掌銓衡子子持公道進退人才必察其實而於抑僥倖杜請托尤嚴選法為之一清天順乙丑英廟復位罷舊官僚公上疏乞致仕南陽李文達公言於上曰王某廉謹老成吏部非此人不可乃不聽其去任用益篤已而

文達被讒黜公力言其淳實可用以故文達復被寵任
焉當是時上眷遇公加隆特官其子國子生玠為錦衣
衛副千戶而賞賚以金玉束帶錦綉衣服銀幣玩器等
物歲無虛月屢召與近臣同遊西苑南城及扈從獵近
郊燕賜優渥一時擢用廷臣惟公言是聽有出他人荐
者亦必待公而後決每召見便殿訪問從容呼以老王
而不名其見敬禮如此辛巳秋加太子太保甲申今上
嗣位賜銀五十兩鈔五千緡是冬命遇雨雪免朝參乙

酉春復加太子太保公年雖高精力如少壯人然無歲不引年致仕且蒙優詞褒答勉留不果行丁亥公有疾上命中貴挾御醫往視并致白粢上尊之賜七月疾益篤請益懇切上不得已允之居數日遣中貴齎賜勅諭并金織衣一襲銀三十兩鈔三千緡時已不能就道至十一月六日卒于京邸距其生洪武甲子二月十一日享年八十有四上聞訃嗟悼贈特進光祿大夫太保謚忠肅遣官諭祭營墳給驛送柩還其鄉以卒之明年某月

某日塋于某原曾祖進昌祖大老父得林俱贈榮祿大
夫太子太保吏部尚書曾祖妣徐祖妣劉妣張俱夫人
配宋氏先公二十三年卒累贈夫人次張氏亦先卒子
男一即玆也女一適河南參政賈傑孫男二長田次隣
國子生孫女二曾孫男女二公天資仁厚操履端方居
官涖政謹繩墨蹈規矩一毫不苟待人外若嚴毅而中
實寬和好惡所加善者悅而惡者不怨論事語簡而質
是是非非確乎不易持己廉潔無私而自奉甚儉薄自

初仕勤勞於外與晚處廟堂皆然未嘗以壯老異心忠君愛國之誠愈篤不懈真厚德君子也蓋無愧于古之大臣矣大宗伯姚公狀公行詳且實矣公子玆欲列石于神道請予文之予素敬重公苟可以焯德信後義奚容辭銘曰

有美王氏世居于灤積善秉義隱處是安避兵鹽山遂定厥家再傳而顯揭德振華其振伊何自公特起降誕之祥虹光兆異乃勵儒業乃第科名荐歷顯位駿望鏗

鉤公出四方憲度肅清弊革利興兵民攸服其在中朝
恪秉銓衡賢才彙進治道乃成公何能然惟道之進惟
公惟廉惟勤惟慎公以接物繩直準平廉以律已玉潔冰
清勤以涖事夜寢夙興慎以存心晨惕夕兢祇事五朝
始終若一為國元老為士矜式官躋一品壽踰八旬推
今較古如公幾人公今往矣疇不嗟悼匪私于公惟德
是好渤海故郡高墳戢戢於乎忠肅千古不磨

奉天翊衛推誠宣力守正文臣特進光祿大夫柱

國靖遠伯王公墓誌銘

彭時

公諱驥字尚德姓王氏其先太原人自秦漢以來為將相者踵接蟬聯族遠而分世次莫可考後有宦遊雲中者因家宣寧即公所自出也曾祖守道克世儒業祖思宗仕元保定高陽尹父成以宦家子留居于東鹿呂村里入國朝遂占籍焉成以讀書力農為務里鉅族程子晉見而賢之妻以愛女是為公之母夫人也公生而岐嶷警敏年十三遊邑庠刻志問學日記數千言識者咸

以遠大期之永樂丙戌登進士第拜兵科給事中剛正
敢言嘗奉命出鎮山西奏蠲徐溝鹽池虧課二十餘萬
民困以蘇尋陞山西按察副使理冤獄戢奸盜風紀肅
清入為順天府尹弛張得宜畿內稱治宣德丁未陞行
在兵部右侍郎越九載遷尚書練達兵政得大臣體正
統丁巳西邊阿爾台多爾濟巴勒數寇邊甘涼數州驚擾尤
甚朝廷患之命公西巡許以便宜從事公至稽閱邊備
知守將法弛而令不嚴嘆曰如此而欲敵無侵凌難矣

翊日集衆轅門詢平日畏敵而不畏將者得都指揮安敬即斬以徇曰自今畏縮者視此一軍震慄失色簡閱戍兵以甘州戍兵冗濫乃定為去留使相更代於是兵得休息民減轉輸之勞敵嘗入莊浪公遣兵授以方略使擊敗之敵乃引去及公還敵復窺邊公馳赴甘肅遣副將蔣貴率精騎出擊戒曰勉之去而不能成功無相見也貴感奮追敗其衆於石城兒臬公計敵勢猖獗不一大撈刈無以示威既諜知敵巢穴所在復以貴為先

鋒搏之自牽驍騎與都督任禮等分道而刻期夾攻轉戰二千餘里俘男女二千餘口敵首走死西陲以寧捷聞上遣中貴勞以金幣命兼大理寺卿支二俸明年還京辛酉雲南麓川宣慰思任發叛亂擾邊命公總督諸軍征之陞辭賜金兠鍪細鎧弓矢蟒龍緋袍以寵其行公至雲南方盛暑衆謂進兵非宜公曰賊毒吾民行可緩乎敢言不進者斬遂部分諸軍以進至金齒分為三道徑抵上江上江者賊砦所在也夾攻三日不下會天

大風公命縱火焚柵因督衆乘勢力戰斬首五萬餘級賊敗走保險為拒公益麾兵深入破連環七砦于沙木籠山又破象陣于馬鞍山之陰死者十餘萬賊首潛遁乃振旅而還先是維摩州賊韋郎羅偕稱廣新王命公還師勸之至是公還雲南計曰此不足以血吾刃當以謀破之乃遣偏師抵其境聲言王尚書大將軍至矣賊黨聞而潰韋賊計窮遁安南傳檄追之安南懼斬其首并妻子來獻廣南與富州接境二土官交惡十餘年公

諭以禍福兩讎乃釋凱旋上遣官迎勞數百里外廷見
宴賜甚厚特封靖遠伯食祿千二百石號推誠宣力文
臣階特進榮祿大夫勲柱國賜誥券追封三代如其爵
未幾聞麓思任發羈于緬甸復以公督軍往取之既至
緬人懷詐黨惡而不遣公縱兵攻緬緬破而麓賊遁去
俘其妻子象馬而還加祿三百石是年春西巡寧夏甘
涼申飭邊備訓練士卒其於守戰攻擊俱有方法西人聞
風畏避不敢近塞戊辰春賊孽思機發復據孟養跳梁

公復督兵往征兵抵金沙江賊柵西岸以拒公作浮梁渡兵一鼓破之賊退立三柵自保公督戰益急不日而三柵拔賊孽殲焉西南自是悉平有苗蠻富者偽稱剋平王別將屢征失利命公掛平蠻將軍印總兵致討卒檻送京師餘黨悉降公還詔增祿百石令世其爵景泰初以南京根本重地委公鎮守公嚴立禁條宿弊一清不便者撼以流言乃解機務就閑天順元年春上復臨朝召公便殿慰諭以勲舊命兼兵部尚書不數月軍政

修明賜金織蟒龍衣二襲尋以年邁請解部事從之特
免常朝賜誥加封奉天翊衛推誠宣力守正文臣特進
光祿大夫勲爵世襲如舊而寵遇益加隆焉天順四年
五月十一日終于正寢享年八十有三訃聞上嗟悼輟
視朝一日追封靖遠侯謚忠敏公初娶張氏生二子曰
玉曰瑑俱早卒繼娶劉氏子二人長曰瑄廕襲次曰珩
勲衛義子曰祥以征南功授錦衣衛指揮僉事孫男三
人女四人諸子扶柩歸東鹿以是年七月某日塋于邑

之平原祖塋禮也公天資沉毅識量宏偉有文武長才
遇事剛果剋煩治劇不以為難行師征討用法嚴明而
料敵制勝雖老于軍旅者有不及故所至即能成功及
其晚節保身全名守以謚虛而忠愛之心始終如一誠
一代之偉人也然所稟猶異年雖高邁精力踰於少壯
疾且亟神猶不亂遺言托冢宰王公狀行而以墓志屬
時時謗才穉筆曷足以公不朽公既有命庸可固辭銘
曰

天佑皇明輔以忠良修文立武咸展厥長於惟王公挺
生冀土川岳爭靈才兼文武早遊藝苑被服書詩乃登
黃甲給事鎖闥流譽飛英踐敷中外爰陟司馬式儀有
位雍容殿陛正笏垂紳手提樞軸潛斡化均視師三邊
程勇戒怯兵將力齊敵聞震疊其有狼噬輒稱以兵馘
強俘弱西北用寧蠢爾遠夷敢為民毒帝師命征惟公
總督建牙秉鉞令一而嚴兵威遠震如火斯炎挫銳摧
堅勢同拉朽止弗窮追懷以仁厚彼昏不知伺間竊發

公而再往根株悉拔和風甘雨妖瞋廓清西南萬里同
我太平惟帝念功官賞是懋列爵䟽封寵延先後入文
出武邈乎無倫名照宇宙允為元臣天不憖遺而遽不
起山頽梁傾朝野哀止爰稽德烈著于幽堂於千百世
赫其有光

南京工部侍郎黃公墓誌銘

謝鐸

弘治辛亥夏六月十有七日南京工部右侍郎黃公卒
公得疾甚暴予亟往視至中途公訃已至於乎痛哉先

是予蒙恩休致公悵然不樂且期太常陳先生師召邀予徧遊南都諸名山以別蓋予自謝病來與公別者十餘年乃今始得一會詎意公方恨予之別而予遽以哭公也哉公卒之明日予既三往三哭之乃與其子備商塋事遂謀所以銘公之墓不得以不能解於乎公其止是哉公諱曜字孔昭後以字行更字世顯別號定軒姓黃氏其先昭武鎮都監緒避五代之亂徙居黃巖洞山今分屬太平公以其地隘不能容始再遷舊邑之西

而定居焉曾祖與庄不仕鄉稱長者祖諱禮遐號松塢
性稱介鄉人服其行義無異詞以公貴贈南京工部右
侍郎父諱彥俊以正統丙辰進士擢兵部職方主事其
操其才人猶至今稱之累贈右通政南京工部右侍郎
母金氏累贈淑人公自幼穎拔屹然如成人未弱冠職
方公即世扶櫬歸塋撫其弟妹益篤初以明經舉不合
乃退而為縣學生刻苦問學公辱與予友予少且劣日
追之日見不可及未幾領丙子鄉薦登庚辰進士第擢

工部屯田主事屯田號濁曹公稍持以正顧為其僚所
怨嫉惡吏誣毀之公雖不之較然彼竟坐是落職而公
之舉亦因以起尋遷都水員外郎調吏部文選郎中在
職守法據例不示恩不賣直凡所舉錯不獨人莫之不
干雖同事亦或以公為辭而若有所憚每公退輒過予
予望而見其喜則知賢者之進見其憂則知小人之不
得退如是者蓋十有五年終始一節不少變後先在文
選者卒驟遷輒敗至或并累其上之人為天下笑公循

循滿考始擢右通政又五年乃遷今職公既去吏部久
人益思之大家宰王公兩以公與今亞卿彭公鳳儀張
公時敏薦不得果然物論在人駸駸未已要皆以鈞衡
望公也於乎詎其謂公而遽止是哉公生宣德戊申迄
今享年六十有四而已配蔡淑人巴東知縣思之女子
男三長即補次佺嘗聘予女俱夭次佐亦夭孫男五紹
繹綰約紉補以辛丑進士為工部主事實克公吾台父
子祖孫相繼登進士第者亦惟公而已公讀書不事章

句往往能窮前人所未至精思之餘下筆沛然而尤長
於詩與吾叔受王城山人慨詩道中絕將力振之有定
軒集若干卷藏于家性恬靜寡嗜好平生無所苟取而
亦不以一毫苟費雖官至三品居室服食無所增惟事
關倫理則惓惓每欲自盡以舊宅之直讓其弟以餘俸
之金周其甥又嘗謂予吾族貧甚且不知學先職方有
田若干吾將以是終先人之志立義塾焉乃歲出束修
若干為之兆初公為主事時憤慈懿太后山陵事輒草

疏數百言示予將上之會事定乃己未幾為會試同考
有權要子暮夜來謁公叱之去終其身不與語今年春
大臣復以例當舉官公舉金華章德懋於是德懋謝病
而歸者幾二十年天下皆知其賢而卒莫之能舉凡此
皆足以見公之大者蓋公晚歲雖寬厚有容與世無忤
而剛直之氣人固有莫得而測之者予交公久知公最
深因為之銘銘曰

豐而譽困而遂不矯以躋盱以覲安吾常以聽其至吁

嗟乎我銘不愧尚後之人以考德論世

吏部侍郎贈禮部尚書謚文懿楊公神道碑銘

王

僕

憲宗皇帝臨御之日遴選文學侍從之臣既自擢用之而尤簡其質重才良博雅有道術者兼任東宮官職俾之日侍儲君以講明義理輔成德性以期他日嗣守太平之業其寄任之專責望之重謂非賢不可也古人有言匹夫愛其子猶知求明哲之師而教之況萬乘之嗣

繫四海之命乎故吏部右侍郎楊公在景泰初以湖省
第一人發解明年辛未登進士第改翰林庶吉士天順
戊寅授職編修與修大明一統志癸未禮部會試聘為
同考官成化初開經筵以選為講官有白金寶鑑文綺
之賜丁亥編修九載滿陞侍講踰月英廟實錄成陞司
經局洗馬賜白金三十兩綵幣六表裏戊子謁告歸省
辛卯主考應天鄉試壬辰遷侍講學士校正通鑑綱目
賜楮幣五百貫預修宋元通鑑綱目未成聞母太孺人

喪上念公侍從久特旨遣官諭祭庚子順天鄉試復為主考壬寅今上出閣公侍講讀文華大訓成陞詹事府少詹事兼侍講學士賜楮幣千貫丁未陞吏部右侍郎戊申纂修憲廟實錄為副總裁己酉七月辭部務命以本官兼詹事府丞專典史事蓋公在先朝不出木天石渠者三十有七年吏部雖嘗薦公為祭酒在廷大臣又嘗合辭舉公入內閣皆不果用後雖稍遷詹事六年而遇今上登極始有吏部之命初當道猶擬公南京吏部

上覽疏取御筆去南京二字左右謂吏部右侍郎劉宣
故在上曰劉宣轉左比公再上章請解部事皆不許既
而章三上辭益懇始許之觀此則先帝之不盡用公與
今上之果於簡用而眷遇之其意固各有在也奈何天
不假年不臻柄用以大展其經濟之才非命也夫公諱
守陳字維新鄆人也自其遠祖仁爽以來十世居鄆之
鏡川大父棲芸先生潛心理學遠宗楊慈湖黃東發諸
公卓然為時名儒父自懲為泉州司倉以公貴累贈翰

林侍講學士母張氏贈宜人公在妊時母嘗夢大星入懷及生天庭有七黑子狀如北斗人以為異八歲入小學已敏慧絕倫讀書目數行下日記數百言稍長能作詩文下筆有驚人語然棲芸教之不以記誦文詞為能而以精思力踐為務公感悟遂作致知力行持敬三銘又題銘于牖以自勵比登第入翰林學益進文益奇議論益醇正每進講必傳經義以納忠誨一日講書說命篇有曰明君圖治嘗患其臣不言忠臣進言惟恐其君不行

臣不言則君徒負聰明而罔聞乎治要君不行則臣徒費辭說而無補乎上德臣言之而君行之若高宗傳說可以為萬世法矣於武成篇有曰魯論稱舜無為治周書稱武王垂拱而天下治是則帝王之治皆不勞而佚也然後世人主有欲悉耳目所娛窮心志所樂而深拱禁中委政內侍者乃召望夷之禍有以朝事付宰相邊事付諸將而高居無為惟寵嬖艷者乃啟祿山之變是何也蓋舜所以無為者由其封山濬川以至舉相去凶

無一不盡其道武之所以垂拱者由其列爵分土以至
崇德報功無一不究其心皆嘗憂勞而有為乃始佚樂
而無為也後世人主則孟子所謂安其危而利其菑樂
其所以亡者耳聖狂治亂之異端繫於此上歛容聽之
大臣退班相語曰真講官也至於應制詩文亦不忘勸
戒嘗作內宴樂語以時方事逸豫則曰謂豐大必宜日
中故享泰尚虞城復以時方尚邊功則曰慕帝舜之格
有苗思宋國之相司馬以時方貴異物則曰不作無益

而功成不實異物而民足乃召公之格言無輕民事而
惟艱無安厥位而惟危又伊尹之明訓公既進呈退語
他學士曰萬一天子過聽不賢於優孟滑稽之談乎會
有詔議祧廟公上疏言禮天子七廟祖有功而宗有德
我太祖皇帝有大功於天下當為百世不遷之祖今憲
宗升祔宜併祧德懿僖三祖自仁祖以下為七廟異時
祧盡太祖居初室四時享祭正位南嚮三歲一祫則德
祖居南嚮之位各不失其尊庶無悖禮時禮官以定儀

九廟以德祖為始祖不祧第祧懿祖而一歲一祫不盡如公議然知禮者建之成化改元正月公上講學聽政之疏其略曰精一執中此堯舜之得於內而為出治之本也明目達聰此堯舜之資於外而為致治之綱也臣願陛下遵用舊制開經筵以講學御午朝以聽政一日之間居文華殿之時多處乾清宮之時少力行堯舜之道而深得於內博資於外則宿弊可革善政可成而唐虞之治可馴致矣反覆數百言於正心修德保邦致治

存天理遏人欲親君子遠小人凡有益於天下國家者靡不詳盡而辭極剴切上嘉納之即日諭禮部以三月御經筵禮部請併午朝如揚某奏制報可至於作史其予奪一出於公書法一以春秋通鑑綱目為準公謂古人云國可滅史不可滅太祖定天下即命儒臣撰元史太祖靖內難其後史官於建文君事諱而不書遂使當時朝廷政事與忠於事者皆缺略無傳及今猶可補緝景皇帝已復位號而英廟實錄標目猶書郕戾王附是

宜改正前代人臣章奏雖不報者猶書近時留中之奏
例不得書乞宣付史館凡若此者數事章未及上而公
已屬疾識者猶深惜之己酉十月太白犯進賢甚急占
者云賢人厄既而公卒於是月十八日蓋其應也春秋
六十有五上聞訃嗟悼贈禮部尚書賜謚文懿命禮部
諭祭工部營塋配丁氏邑名家女初以公貴封孺人後
進宜人時節入朝賀兩宮加賜賚貴富矣猶日課諸婦
習女紅不輟教諸子勤問學以至於有官於朝猶訓飭

之使無忘儆戒宗姻外內頌其賢年六十四以庚戌六月十一日卒其年十一月六日與公合塋玉堂山之原三子茂元中乙未進士累官湖廣按察副使茂貞早卒茂仁中丁未進士授刑部主事孫男七美珩郡庠生美璜美琚美璠美瑤美環美瑜女三公天性孝友與人交篤於信義居常退遜體若不勝衣言若不出諸口至商確義禮論事是非曲直則侃侃剛直雖壯夫不逮也嘗被命教內侍省嚴立規範無少假貸教成多去為近侍

與公同事者率因之取寵貴而公獨無少資藉士論多
之公勤學喜讀書遇有所得即為註著蚤歲嘗作五經
四書私抄叙正其錯簡更定其章句擇取諸家傳註而
自以所見立說晚年屢加刪定皆擴前賢之所未發而
詩書二經尤為精到至其家庭授受而用以取科者則
專門易學蓋公既得之棲芸而遂以傳之弟若子公弟
三人並舉進士守陞亦魁浙省歷官翰林侍講春坊諭
德守隨由應天尹為廣西參政守隅工部主事文學正

禮理爭爽競秀而茂元茂仁尤濟美焉公為文舉筆立
成不煩宿構詞雖閎博而卒澤於理詩尤渾雄流麗然
不戾於雅正四方求者接跡戶外公應之不以為瀆也
其所著有晉庵鏡川東觀桂坊金坡銓部諸稿藏于家
公疾亟語諭德君洎茂仁曰吾學至為君子仕登三品
年邁六袞夫復何憾惟新天子厚恩未能報先祖棲芸
先生未及封汝曹其勉圖之又曰吾所交皆文章鉅公
然知我深者惟冢宰王廷貴我死汝求作神道碑言訖

精神猶耿耿喘息漸微瞑目端坐而逝公卒後越月茂
元犇訃過金陵以公治命告予既而諭德君遂以公行
述來顧予何人乃敢承公之託耶第以同年及第同官
翰林道義相親之日久公三弟府尹諭德嘗同宦兩京
工部從子受業南雍而予子參政沂又公考應天時所
取士公子憲副復與沂同年契誼之深誠無有過于予
者遂不揣菲陋撮公言行之大論次之而系之以銘銘
曰

惟古盛時士方多聞窮理以學載道以文世教日淪俗
儒滅裂學殖將落辭有枝葉有煒揚公越產奇才夙承
示訓茂擢倫魁繼登甲科列職翰苑更事三后荐沐天
眷今皇紹統信任不疑曰予舊學先帝所遺公感知遇
誓竭忠藎銓管稱平論諫無隱春秋之筆周孔之言總
裁國史勸講經筵道合議從秉用伊邇邦國殄瘁而公
已矣訃音上聞當寧興嗟寵終之典視衆有加感恩未
報公有遺恨易箴之言以勗厥脩有弟有子世學世科

三鳳二雛踵接肩摩諸孫振振亦復穎異世德方殷其
承未已公雖云亡簡編具存殘膏賸馥沾丐後人公亡
無何宜人奄逝淑德令儀殆不勝紀玉堂之山有封若
堂既固既安雙壁共藏墓門有石過者必式公有治命
予無愧色

謝文肅公行狀

黃綰

先生姓謝氏諱鐸字鳴治別號方石少穎敏能為韻句
年十四其叔父逸老先生授四子毛詩輒悟大意將冠

遊邑校與綰先大父少司空友大父樹立堅特罕比獨
先生相與砥礪慨然以古人自期天順己卯發解第一
人甲申登進士第與今少司長沙李公大司馬華容劉
公同選入翰林為庶吉士益肆力學問學士永新劉公
莆田柯公典教皆深器之成化乙酉授編修預修英廟
實錄賜銀幣陞俸從六品癸己被旨校通鑑綱目先生
因指歷代得失為疏數千言以進曰宋神宗好通鑑理
宗好綱目徒知留意其書不能推之政治因論時政之

失宜求賢講學見諸行事不為二君之徒好甲午被旨
入讀中秘書條上西北備邊事宜略曰河曲一方近失
聲援敵人伏為窟穴夫大河為關輔之限而受降東勝
又大河之藩籬失此則河不可守其何能及況綏延經
榆林至寧夏二千餘里列堡二十有三馬步軍二萬三
千有奇老羸半之是以往歲寇掠如入無人之境東自
孤山柏林諸堡中自平夷懷遠諸堡西自靖邊清平諸
堡又西則寧塞諸處直抵金湯川安邊諸處直抵環慶

花馬池諸處直抵固原以至土門塞門山城諸處莫非
寇入之路朝廷久為搜套之策疑而未決及此無事正
宜蓄兵養銳于大同寧夏以為東西之援漸圖收復漢
唐故疆與國初東勝之地據三受降城以極形勢守其
不攻者策之上也又曰今用將帥皆晚唐之債帥也戰
沒者士卒而名數不聞克捷者士卒而賞歸權勢剋滅
之暴辦納之艱怨塞胸腹得而使之乎言甚剴切皆鑿
鑿可用乙未秩滿陞侍講入預經筵反覆推說皆人所

難言庚子丁外艱再罹內艱守禮如古壬寅終制謂人
曰初心冀祿為親今無及矣苟仕非義也遂以疾聞明
年癸卯吏部趣起復堅以疾謝捷門讀書暇則侍逸老
登眺方巖雁巖之上仕進之念泊如也孝皇初新庶政
于是廷臣交章論薦會修憲廟實錄詔起之先生未決
大父與長沙公貽書來勸遂行入朝供事兵館書汪直
王越開邊事最直庚戌陞南京國子祭酒以廉節為教
士皆刮滌有以請托自愧者又疏上國學事宜曰擇師

儒慎科貢正祀典廣載籍復會饌均撥歷其論祀典略
曰孔廟從祀之賢萬代瞻仰教化之原龜山楊時程門
高弟實行延平之派新經之闢足衛吾道而不預從祀
臨川邵公吳澄生長于宋而顯于元夫出處聖賢大節
忠義古今大防身事二姓跡其所為不及洛邑頑民顧
在從祀之列臣固不能無惑况二人皆太學之師其于
廟祀黜陟不可不正先生以師道難盡疏請致仕不許
明年辛亥仲子死先祀無托遂致仕諸生以狀歷部臺

請留于朝先生嘗抑諸生之納粟馬者至是舉則多所
抑者一時薦紳榮其歸皆祖于郊外家居幾十載惟讀
書求志日不少懈勢利一毫不嬰于懷天下之思其人
想其風者皆謂可望而不可即而薦者益力孝廟于是
深知先生欲大用之戊午會國子缺祭酒吏部以先生
名進上特命陞禮部右侍郎掌祭酒事遣使就其家起
之先生兩具疏辭疾長沙公在政府貽書諭上意乃行
次越得疾徑歸以狀投紹興府繳進力求致仕不許又

疏投台州府轉奏知府不敢上給事中吳世忠主事潘
府言當速起以盡正人之用使者再至有司勸駕益急
遂行至京以求退而得遷非義所安辭以舊官供職不
許始受命其為教如在南雍時地震詔諸司言事因上
章論維持風教四事而論黜吳氏及納粟馬之害尤切
連疏乞致仕六館師生上章乞留廷臣吳世忠張芝吳
薜薦益力被旨不允癸亥上命會輯通鑑綱目并續編
為纂要先生為潤色官論黜晉隋胡元之統說皆有據

任職三載念祖母趙氏守節未白俟滿考請以本身誥命易為趙氏旌表例死者不旌上特破格行之仍給誥命既而復疏乞致仕半歲之間疏凡五上辭署印至再四上皆以溫旨勉留又不能奪方許養疾命驛歸俟疾愈以聞正德戊辰吏部上其名會權奸用事遂令致仕先生歸六歲終于正寢享年七十有六正德庚午二月二日也有司以聞贈禮部尚書諭祭賜謚文肅命進士桂夢治其葬塋其里賜畧大夢山之原先生性孤介簡

朴無華節操堅勵慎取子有防畛晚始寬涵有容居常坦坦雖庸人孺子得親之及遇事則斷斷一定不可奪志耻溫飽布素疏食將以終身常曰吾無他長惟安分知止而已故其生平不吝義退不榮倖進其進也反覆辭免至不已而後就其退也量任揆已奮而決去此其出處大節本末甚明夫豈偶中倖致者前時學士大夫務希世進取巧躋捷攫揚揚得意由二三君子天下乃始貴名節尚廉恥嗚呼先生志不究才不盡用澤不加

于民惟流風猶悚動後世先生之功可少哉國學自會
膳不行膳夫之輸常為祭酒故有先生獨不然盡籍貯
于公不私銖兩乃措之廢墜如南雍構二樓度故典刻
板北雍增號房寘官廨修文廟開廟前衢奏均屬官與
諸生之貧者有餘貯之以需會膳之復行諸生至館用
賂教官謂之班錢為禁止之又捐已卑銀以賑教官之
廉者平生不喜與內侍往來在纂局有內侍之執權者
每設食恭禮丐一言不可得見義必為先公有遺田若

干畝以供先世祠墓祿食稍贏輒買田代之分給諸弟
置家塾資宗族貧塋又買田分諸姪而又勸方巖書院
築牛橋閘與姻親故婚喪患難之不瞻者鄉郡先哲行義
著述靡不蒐輯表闡君子小人進退消長之機未嘗不
感慨深嗟而掩袂也于書無不讀其所為文甚多尤長
于詩蓋其精識絕人論議歸於一是所著有枕溪集續
真西山讀書記伊洛遺音伊洛淵源續錄四子擇言元
史本末宰輔沿革國朝名臣事略尊鄉錄赤城志及文

集詩集論諫錄總山集百餘卷先生裔出晉康樂公宋
經略使鞅始遷黃巖縣學西元末孝子溫良再遷桃溪
今隸太平曾祖原睦祖性端贈禮部右侍郎妣趙氏贈
淑人即節婦考世衍封編修贈禮部右侍郎妣高氏贈
淑人從叔父省寶慶太守所謂逸老先生及其弟王城
山人續皆以學行重于時先生娶陳氏繼孔氏宣聖五
十七代孫皆贈淑人子男三興仁興義皆天興寅側室
焦氏出女二長聘綰叔父佺俱天次適金忻孫男一必

祚興義遺腹子以陰補國子生曾孫男二某某綰竊惟
早歲受業受知先生特深世契尤篤非綰無以撫其詳
故必祚以遺行見屬義有不得辭者謹為狀以告立言
君子庶先生大節百世之後有考謹狀

南京都察院右僉都御史張公墓誌銘

呂原

公諱楷字式之世為寧波慈谿人曾祖好古祖叔皆有
隱德父惟哲及從父咸以能詩稱惟哲以公貴贈監察
御史母毛氏贈孺人公少穎異書一覽即成誦年十四

為邑庠生習詩書兩經又習通禮記甫十七中鄉試登永樂甲辰進士第例賜歸益肆力古文詞宣德初試政兵部以公務詣陝西有能名還擢江西道監察御史時刑部獄吏受賕繫囚有佯死得脫者事公劾奏尚書而下十數人皆坐黜越六年考績赴行在因獻頌留候鴻臚寺今上初服乃詔還任江寧人有夏三者詭誘鑄工吳謙書牒而用以已所造偽印事覺謙誣服公廉得其實乃以謙罪夏三又有指揮陳旺其養子俊與妖僧構

逆罪當連坐審俊係蘇州人幼育旺家稍長逃去且久
已因置旺勿論其讞獄明恕多此類正統庚申遷陝西
按察使僉事再遷副使董屯田水利及讞決郡縣疑獄
咸有成績嘗以地震上封事又上安邊十二策悉見嘉
納歲丁卯召拜右僉都御史值畿郡蝗即遣公巡撫所
歷授以捕蝗之法蝗為悉哀并奏懲長吏之不恤民者
聲望凜然是年延平盜起朝命都督劉聚往討而以公
贊其事臨行賚以金綺寶楮公榜諭前途其兵所過民

不知擾抵廣信聞賊圍延平急亟令善馳者賈榜諭以
威信賊解去尋圍將樂公遣別將由間道襲擊賊敗潰
死者甚衆賊首鄧茂七退保陳山公駐師建寧潛遣兵
趨延平用降者為間示以弱賊乃復出攻延平公指授
方略命以南京浙江江西分兵伏沙溪諸處而以福建
弱兵挑之賊果全集發兵合擊大破之俘馘萬計茂七
死于亂兵茂七扇亂閩盜所在紛起朝廷慮公兵寡弗
敵繼遣寧陽侯陳懋等將大兵以往至則茂七已死乃

與公分討餘寇公與劉都督自延平進攻石門襲五臺館皆大捷遂入邵武拔峽陽最營觀音山下時賊寨九龍山巔留渡溪筏于峽間公夜選壯士三千設伏復遣舟兵遡峽撒其筏且戒曰賊覘我營兵少必悉衆來攻當速入其寨而反攻之比旦賊果悉衆去至溪許以無筏奔還而我兵已據其寨賊窮蹙盡降延平郡邑遂定初處州葉宗留者與茂七同時倡亂朝命都督徐恭往討久未克及是命公與恭犄角還至金華聞恭師次金

公山下勢危甚即倍道抵其境立寨甫畢賊至公令語之曰吾斬鄧茂七者爾能戰乎否則來降賊氣索而去策其必復來預部署以俟明日賊果大至公麾兵擊之少頃佯北賊追逼柵中樹大赤旗伏兵四起斷其歸路一鼓殲之餘留寨者望風降款處州復平公初議以賊皆良民脅從者可憫故所至先招後勦全活者不可勝計景泰初凱旋嫉公功者誣公以罪罷官歸天順更元始詔公復職致仕明年公入謝時陝西方用師禦邊議

擇選臣往佐師以給餉備騎莫果敵士遂以屬公公往
悉心區畫事完召還命往南京蒞任又明年冬公以賚
表來京卒于朝邸訃聞宸衷悼惜遣官諭祭特令有司
塋塋蓋異恩也公之生以洪武戊寅三月二十二日而
其卒為天順庚辰十一月七日享年六十有三前配丘
氏贈孺人繼胡氏封孺人子男三應麒醫學正科應麟
寧波衛撫應鵬率材抱德女二長適余凱次適萬宗希
孫男女十有二人公早孤事母孝心地坦豁喜獎誘人

之善接賓客有禮而周窮拯難有恩義其學自經史諸
子至天文醫卜釋老之書靡不涉獵為文章有古法善
行草篆隸尤耽於詩平生吟咏未嘗一日廢口占下筆
頃刻立成而俊逸清麗新意疊出嘗選詩和唐音草堂
詩餘及李詩古樂府七言律許渾丁卯集高季迪缶鳴集
來中峰梅花百味總數百卷餘若輕侯集百琴操出於
自作者尤多海內之士皆耳熟其名而朝鮮來使往往
市其和唐音以歸其他所著又有四經糠粃大明律條

撮要武經小學增廣事物紀原及孔子聖跡圖贊諸篇
應麟應鵬將昇視歸乃以翰林編修同郡楊守陳所為
狀來乞銘銘曰

我我四明鍾英發奇是維張公早齡岐嶷爰飭儒術擢
第于時以司邦憲聲華四馳載承天討威彰惠施功成
進退行藏自怡起佐南臺益將有為溘焉告終吁嗟可
悲生平飽蓄申以文詩弗亡者存其在于斯

胡端敏墓銘

吳鼎

嘉靖九年秋九月丙辰晦致仕太子太保兵部尚書胡公薨于家天子聞訃輟朝賜謚端敏策贈少保遣官祭凡九勅有司營塋墓在五雲山之岡其子純卜十年九月癸酉襄事請銘公諱世寧字永清別號靜菴世杭州仁和人祖諱嵩考諱瑤俱贈吏部右侍郎祖妣張氏妣馮氏俱淑人公起家昌化諸生舉弘治五年鄉試第二人六年第進士八年授德安府推官十三年拜南京刑部主事十八年署員外郎毅皇帝即位詔實授加奉訓

大夫正德二年署郎中三年出為廣西太平知府未幾以母喪去職六年復守寶慶七年擢江西按察使兵備東鄉十年命為福建按察使未拜而坐前告言寧庶人宸濠反謀謫戍遼東十五年起徙中就家拜湖廣按察使旋擢僉都御史巡撫四川今上改元以吏部右侍郎召聞父喪還四年以兵部左侍郎徵入五年改南京吏部六年拜南京工部尚書是年秋以左都御史徵拜刑部尚書未上加太子少保左都仍舊入見辭免宮保俄

改刑部尚書七年轉兵部加太子太保八年得請致仕
已而召起南京兵部尚書參贊機務太子太保仍舊公
固辭不拜而明年薨矣享年六十有三配李氏封淑人
子男一純也錄為太學生女一嫁富陽學生何機公幼
有大志數夢偕于少保立朝與議軍國事其學務實用
凡規為建白具出定見決非偶然者為人廉約剛方遇
義不可毅然必達其志不肯養交安祿專心奉上而已
然亦坐是寡合遭訕怒初為推官以才節著應風憲召

顧拜留都散郎久之得補遠惡郡郡領州縣率土官雅不庭參公下令延訪長吏土官有求謁者推至誠與語却絕其餽獻及因他出過其營單騎直入坐帳中縱閱騎射良久乃還他日子弟應嗣官者輒為任之良厚由是民夷感其恩信唯太平州李璿悖父據印坐法不就建公知龍英州趙元璿善用兵密檄其捕璿且授之方略元璿乘璿不意猝起師攻之飛炬焚其州治璿走保山寨未拔公解衣齎犒元璿曰以吾衣贖一州生靈也

寨中兵聞之感泣解散元珪擒璿及其印章名馬來獻
公發璿所聚粟以賑被困之民且悉除其租賦一年遂
能懷服諸夷治聲大起其為兵憲時宸濠反有狀人莫
敢言公獨上疏略曰南昌失火延燒萬室基地便利盡
歸王府債負所責遍及閭閻庄田所侵激民立寨都司
布政司按察司官多為鈐束問刑參吏受成而行近者
買辦漸行於外府騷擾遍及於窮鄉臣下懼有隱禍多
懷二心禮樂政令漸不出自朝廷地方之事益有可慮

者矣寧王自得衛兵以來威勢日橫而上下官司承奉太過臣請戒諭寧王遵依祖訓止治其國內官僚勅鎮巡以下官凡王府所委事必須奏可方行庶幾小民有再生之望地方無意外之虞累千餘言不果用濠乃賄結諸用事者計欲殺公杜衆口而指撻疏中禮樂政令不出朝廷諸語為離間親親妖言誹謗奏逮公捕繫錦衣獄考掠因篤於是給事中御史交章訟公寃久之得減死論及濠反書聞議除公謫籍還鄉里待次今上更

化首以忠直受知馴至大用矣其自留都召入當路者頗有力然公不肯與黨坐臺僅踰月忽更司寇實疎之也迨陳九疇獄起人始服公持正九疇為兵備時有禦土魯番之功先機掎殺其內應夷人事連故總制彭公澤至是憐人聶能遷上書言哈密不能興復由九疇啟釁徵陳下刑部獄蓋時有主之者將議陳極刑奪彭為編氓公嘆曰使我典刑獄而殺一忠臣吾寧先死乃密疏為彭陳申理人為公危之賴聖明感悟九疇得不死

然王尚書瓊遂主通番以復哈密為任會公拜大司馬
得竟其事且列夷情變詐非由啟釁今圖復哈密無益
而歲受土魯番之挾我為奸利則宜有覺而速改因陳
轉危為安之策意在勿勤遠略專撫近邊上悅其言屬
時宰有所軒輊遂不盡用其策公又疏請增武備足邊
儲而薦馬昊陳九疇施儒揚必進堪統軍旅上為起馬
都御史昊將用之他亦付所司議行矣桂冢宰詆公侵
官疏昊不可用事中止公遂疾求去且以任人之要為

上極言之上留公公求去益力詔乘傳還鄉里優賜輿人月廩未幾上更諸用事臣思公強起之公遂稱疾篤然猶勸上圖廣嗣育容受直言愛惜人才云公所至具有政跡入朝隨事效讜言多不詳紀紀其大者以銘其辭曰

維南有鶚天鑒厥慝乃錫忠貞鎮衛社稷謇謇正言式遏寇賊居東四年罪人斯得以我公歸保乂皇國更踐四卿文武作憲匪躬是謀嘉猷入獻自牖納忠此曰黨

同違衆匡拂彼曰沽直憂心如惓孰窺其極刺姦若讐
體國若子秉志不回誓以九死好爵弗縻捨車就徒高
朗令終足愧鄙夫有蟠名山有折大江有戕茲封與國
無疆

都察院左副都御史惺菴龐公行狀

郭棐

世有讜言直諫之臣而後天下以氣節自植世有宏濟
勛勩之臣而後天下以勛業自見世有純誠介直之臣
而後天下以道德自珍世有論納黼黻之臣而後天下

以文章自顯君子修此可與翊世運矣吾鄉惺菴龐先生其庶幾乎先生諱尚鵬字少南其先文王之裔畢公之子封於龐因為氏至宋有諱晏者由雄州珠璣里遷居南海疊深是為始祖高大父元曾大父英大父閒樂公弼以先生貴贈嘉議大夫都察院左副都御史父賓梅公憲封文林郎福建道監察御史贈嘉議大夫都察院左副都御史母鄭氏封太淑人先生以嘉靖三年甲申正月十七日生是日五星聚娵訾之次七歲就外傳

初名諫字懷忠九歲善屬對客有試之曰挿田士女退
行還有進工夫應聲曰出塞將軍死戰豈無生富貴時
奇之識者知為大器年十六從舅氏鄺養吾學日益進
就三水邑試近午納卷令郭公梅奇其文置優等十七
歲上書代巡洪公垣送白沙祠作養二十一歲試儒士
邑令方公大樂太守胡公鳳督學林公雲同俱置第一
應本省鄉試未第充順德諸生丙午秋中式鄉試又逾
年娶淑人楊氏乃月竹公女也癸丑舉進士觀政兵部

從尚書聶公豹講心性之學暇則講讀律令辨析疑義
甲寅授江西饒州府樂平知縣樂平號難治甫下車即
問民疾苦與當興革者首禁兩關格鬪民始不敢爭競
立崇正敦和興賢永新四社學以造蒙士捐俸置田設
學約會規以淑生徒又勅宋洪公皓明許公瑗及漢孝
女曹娥祠邑人知重忠義節孝先生之力也且持已廉
介一毫贖鍰不入私囊至猾胥豪族則法繩之不少貸
丁巳部使者首薦賢能應召入京士民泣留追送三百

里為立去思碑是秋改福建道監察御史巡視南城時
錦衣官校暴橫害民中貴長隨冒勉差役先生悉正之
法革火房濫支隨朝之米裁五城派歛公堂之席事似
纖細而所關者匪小戊午奉命覈浙直糴餉己未疏劾
總督胡宗憲欺罔不報秋上防倭五事一曰總督駐劄
二曰酌派徵分糧三曰禁專泥訊地四曰修要害衛所
五曰重臨海府分其防倭法恭備矣庚申巡歷事竣疏
劾總督胡宗憲鄢懋卿等冒破邊餉語侵嚴相幾中竒

禍風紀肅然復疏通變宜民究軍伍庫役之弊請建清
遠府治論控握形勢之要皆切時務辛酉春考績封父
賓梅公如其官母鄭氏太孺人妻楊氏孺人三月差往
河南夏五月抵開封蒞試事所錄何洛文等悉一時名
士汴梁強宗多撓法首鋤抑之藩封歛戢貪墨吏望風
解印綬時稱龐鐵面云白鹿見嵩山蔡巡撫議以獻先
生執不可事遂寢冬疏賢否備大察務極精核議處宗
室祿糧條陳州縣賑卹及論左使濫陞巡撫風裁凜然

壬戌春聞賓梅公艱計即跣出汝南先後文武宴席交際金幣盡令貯使司變價支用既抵家哀毀擗哭踰度癸亥冬塋賓梅公于近泰山是年刻宗圖以聯族定鄉約以淑人甲子捐貲建三祠以祀其先夏四月服闋冬補江西道御史巡按浙江仍留理大察事舊例賢否祇據各省五花冊報及南科道劾疏黜調無一免者先生言于御史大夫曰此非宋人所謂依樣畫葫蘆耶何以服人當就中選譽望者破格留之其惜才之意蓋殷殷

也乙丑四月次南安劇寇李文標流劫郡縣騷動先生
畫策築土城練民兵以嚴保障復議建大庾學既抵浙
不逾月䟽上里甲均平悉著為令節中歲織造以供尚
方先生䟽陳利病遂立局以便民省費數十萬修岳武
穆公墓建孫忠烈公祠在浙多所條陳節冗費以甦里
甲查冒免以恤竈戶慎廩貢以別人才行條鞭以均徭
役其最大者初議條鞭之法有司及鄉士夫皆以為疾
先達鄭公曉趙公錦陸公先祖移書力言其便議遂決

嚴禁騷擾驛遞南都差官有蹈其轍先生抗章劾大司馬自後通行勘合別省符驗一均裁革首鋤豪強無所假借士夫橫縱輒置于法或奏褫其冠裳議處有司巡鹽事宜計靖浙直江西三省礦賊巡撫劉公幾勦平之屬公紀驗釋出幼小者千餘命至議處壕鏡澳夷議節東省兵費又皆桑梓切膚之慮丙寅五月奉勅提督北直隸學校發杭州日父老泣留者數千人諸郡並立生祠百姓爭尸祝之及抵京首言重學校以養人才次言

正朝議以肅綱紀都諫胡應嘉劾太宰得罪先生申抃
甚力劾輔臣郭安陽與高新鄭表裏為奸不報隆慶改
元糾正百官朝議復疏言弘獻納以光聖治順服御以
重郊裡舉遺佚以惜人才劾輔臣以申戇直廣卹典以
勸忠義嚴考察以儆官邪又疏言兵部尚書翁萬達湛
若水以勲庸道德而贈謚未及張潔王漸逵黎貫戴銑
薛侃以建言得罪而褒卹未聞題覆悉如先生言夏六
月侍經筵預修肅皇帝實錄冬十一月陞大理寺右寺

丞上舉劾疏戊辰覆審罪囚左右寺任意考扑呼號徹
天先生言于堂曰廷尉持天下之平求當其罪而已何
筮苦之是月擢都察院右僉都御史總理兩淮山東長
蘆鹽法兼理南直山東河南遼東保定薊北三邊屯田
先是上諭輔臣集九卿科道議備邊長策以修理鹽法
復興邊屯為第一事廷議推服先生三月立東宮貽贈
賓梅公中憲大夫都察院右僉都御史母鄭氏太恭人
妻楊氏恭人是月駐東昌劾內監張恩擅懸金牌馬船

假威漸不可長由是宦寺屏息五月至淮安請建兩淮
鹽運司學校復上通鹽法講屯政議處民竈糧差諸疏
時巡鹽孫御史賍贖不明檢舉查覈大察遂罷之張給
事淆亂國是阻誤邊餉亦以事干職掌論罷而言官惡
傷其類遂紛然思中之原任三邊總督都御史曾銑議
復河套殺身亡家先生請加存恤以勵忠義且謂收復
河套之舉為御戎第一義云政暇著復古八議皆以挽
流俗矯奢靡確然有關世教又毀鄆懋卿生祠于滄洲

以祀漢龔遂蓋滄洲乃古渤海郡也秋九月大學士張公居正及兩都臺諫論列屯鹽廢置狀事下吏戶兵三部覆議裁革督臣獨留先生專理薊遼宣大榆林寧夏陝西甘肅三邊屯務已巳上薊鎮屯田疏曰借征調以實邊塞曰固邊防以興農業復上儲養邊才疏請通行撫臣各舉一人自代嚴申濫舉之罰令勿徇私疏薦密雲兵備副使張守中以示優錄任事之臣又上修聖政酌時宜絕薄俗正風紀優言官廣忠益伸公論銷禍本

諸疏復言世廟大禮得罪諸臣盡皆卹錄獨大獄得罪者未蒙議卹蓋闕典也且追劾郭武定淆亂國是之罪又疏遼東宣大延安寧夏甘肅各該屯田事宜復進會計錄言邊民愁苦臣欲繪鄭俠之圖時壯其言十一月次甘州作儒學記深戒俗學支離之弊是月與總督尚書鄭公崇古搗河套巢穴大捷疏聞朝議邊臣互相標榜故功不行庚午春正月至莊浪御史部永春誣論之疏下吏部太宰楊公漣抗言先生敬歷中外並著風裁

今當疇咨邊才難得高新鄭不悅傳旨切責楊公罷去
先生落職歸里於是兩京九卿科道各會疏留楊公與
先生不報遂出蘭州紅城子渡黃河而南先生巡歷各
邊躬詢士卒悉諸險要隨筆輒錄作行邊漫紀於邊事
為最詳既抵家卜築疊深不出城市辛未春正月作師
儉堂修俗譜家訓鄉間咸以為式四月以浙江織造事
削籍先是揀解從寬或有諷者先生曰此舉省數萬金
之費活千百家之命吾何愛一官卒果如其言壬申著

殷鑒錄始以奸邪終以災異可為鑒戒拳拳見憂世之懷是冬南都科道會薦先生癸酉春本省撫按又會薦甲戌春陪推巡撫鄖陽秋陪推操江冬陪推河南乙亥秋陪推貴州八月陪推四川丙子春陪推江西冬十一月以僉都御史提督福建軍務兼理巡撫丁丑春抵福州先巡撫劉公克誨苦心經畫積餘餉銀七十萬可足三年兵食故先生得以寬恤奏減免徵幾四十萬按院商公為正同心共濟閩人謠曰龐公為父商公為母來

我閩中捄民疾苦至今頌之不衰上薦拔異才疏舉漳
州同知沈植秋七月上防汛叙功疏舉副使喬懋敬等
尋陪推協院左僉都御史十月彗星見上疏自劾戊寅
春正月陞左副都御史協理院事是時執政張江陵奪
情起復公移書規之曰自古大臣遭喪強留多非出上
意自好者不為公顧為之乎語甚剴直同事閩中給諫
蕭公崇業大行謝公杰鄉先生宗伯林公濂知江陵必
不能容請遣使追回不聽戊寅二月上考滿疏三月陪

推總督河漕恭遇皇上下大婚禮成贈閒樂公賓梅公如其官母鄭氏封太淑人妻楊氏淑人夏四月出福州士民扳留哭聲震天八郡為立生祠其撫閩時所興者若條鞭法保甲法建鎮東衛營房修洪山萬安江東橋道開省城河三十六灣修龍溪縣儒學定守城及防火事宜刻節約迎候規則酌蠲免錢糧條款皆閩民大利也所革者若庫夫斗級鋪行官價地方夫坊長管辦十里管徵站銀頭戶課殿兵船各澳抽盤解官請托管糧常

例橋夫索商銀皆閔民積害也其禁約則如公差凌虐驛遞站頭扣索常規保家包攬過關錢米衙門坊里迎春到任劇雜皆有功於民崑其奏免則如軍餉餘銀各埠秤稅驛遞站銀解部防夫餘丁年例寺田充餉多者數十萬少者不下數千皆有甦于民瘼者陳給事叅先生考滿年月差錯命回籍聽用蓋同官王某與江陵尼之也部議猶謂其才終不可棄時太淑人病篤抵家逾時獲與永訣識者謂先生純孝所致云先是廣中通省

均徭十年一役凡編庫子斗級站頭即千金之產費於
一旦官戶冒免田錢難售先生率行條鞭法以一年之
差分之十年抑且十甲之中止免一甲近來富民免賦
役之苦細民無追呼之擾田貴三倍士民咸捐貲為先
生建生祠元輔趙公志臯扁其額曰永賴鄉先生有恩
德及民而祠祀者宋有崔菊坡公明有先生二人而已
庚辰重建三祠修百可亭其上男二長端業府學生娶
周氏太學生周履祥女繼娶陳氏李氏次端穆娶岳州

知府霍蓋臣女女一適吏部郎中吳中謙次男庠生吳繼亨孫男五女孫四先是七月斗昏中先生知天文指示家人曰歲星在南斗予命登磨蝎其不免乎八月二十日尚巾櫛酬書札次日沐浴更衣疾篤家人問後事不答惟以未報國為念須臾正襟而卒享年五十有八訃聞無問識不識莫不於邑流涕嗟夫天何奪先生若是速哉先生生而穎悟長而敏達為文章下筆滾滾萬餘言不休其學博而識練其慮事周詳動中肯綮其

器宇宏大不為瑣屑齷齪態其事親孝其待弟和有恩
與人交而有信平居無疾言遽色而凜然不可干以私
雖燕居必巾服肅然至接人則和氣恂恂可挹也其立
朝守官披竭肝膽知無不言自為御史歷今官上封事
何啻百餘首其言讜其意忠其指陳剴切而多闕民隱
所條奏多得溫旨未題覆者補綴前疏復上如優容言
官疏凡四上正朝儀疏凡三上其論劾則正氣稜稜不
避權貴而猶以培植人才為念至其臨大事決大疑持

論侃侃雖賁育不能奪海內士大夫莫不想望風采嘉
其有大臣度嗟夫先生氣節足以廉頑立懦而不瑣屑
委靡以干赫赫之名勲業足以裨國安民而不矯激詭
異以徇皎皎之譽道德足以作人範俗而不媵阿脂常
以耿耿之心吐為文詞汪洋浩蕩如長江大河精密
清新如豐林叢秀所著奏議十卷詩文集十六卷殷鑒
錄三卷史略卧遊錄二氏測各一卷行邊漫紀五卷咸
宏博明達大都不詭于聖門而有補于世教傳稱立德

立功立言為三不朽若先生者其洵足不朽哉予嘗評
先生學問醇粹如董江都通達國體如賈太傳直道敢
言如汲長孺引事比類如陸賓客疏朗洞達如寇平仲
孤忠直節如蘓子瞻即列于昭代名臣何愧哉某不敏
承先生以道義砥礪易簣前旦手書猶惓惓相勗嗟乎
何得復起先生九原哉先生仲弟尚鴻持論侃侃不隨
流俗有先生風節茲偕先生嗣子端業詣予請為先生
狀將以丙戌年某日與楊淑人合塋于沙坑清水岡未

坤向之原求名公志表其墓謹述所見聞用備大方採擇云

明故南京太僕寺丞王子敬先生墓誌銘

董份

明興重翰林自庶吉士始昔周歌吉士未有其官皇祖舉數千載曠典開文樓置館駕數幸親校肄優異之而肅皇帝諭閣臣以翰林承顧問俾輔弼宜慎選而壬辰歲選而報罷罷復選之甚慎重也至辛丑歲上親命題覽卷定其次而浙王子敬者在選中浙首省而子敬發

省解第一人為東南才子海內博士翕然退讓之稱王
先生云而諸吉士見之亦曰此所謂東海王先生者也
皆推焉而予敬獨善予予兩人自以幸居著作庭紬天
閣東觀書益涉躐貫穿法古昔矯近世反之乎正成一
家言自許當不負久之予承乏史局而予敬改刑科給
事中每恨同趣殊途不復能究其業而予嘗語諸君觀
予敬身不踰五尺志雄一時數叩首伸眉論天下事意
欲有所出之得其當以報主上匡國家其素所蓄積也

而茲列諫爭即他日有披肝瀝胆仗下誓死不回者必
吾子敬也會禮部試天下士故事考官入試闈中各局
戶閱所分卷人不得數往來卷不得更易而考官彭者
分宜人怙勢險詖剛暴士也居常突入他考官所強其
卷奪之他考官不能拒已相顧咤矣及出而輔臣翟公
二子皆在彭取中覈之則奪他考官卷也以是人益咤
而京師大俠張者亦江西人與彭乾沒以財通而故從
二子所鬻權而奸利至是益出入彭翟間醉酒宣洩事

甚露諸師無不傳相語咤矣而翟方當國人未敢動又翟在諸輔中能恭謹下士士感其煦濡忍之而予敬獨奮曰所以稱耳目臣者謂其挾幽發隱備所未睹聞也業已彰著而忍不發謂耳目何且天下事孰有大于貢舉者乎而輔臣以提衡總綱紀表正百官為職而令貪人大猾挾其子行私籍籍播汙惡言而猶欲掩耳目蔽日月又何可忍也乃抗疏疏上肅皇帝下其事詔獄逮彭張雜考之引繩批根得其實上盛怒立罷翟黜其二

子而彭張或黜或戍他考官謫有差蓋天威赫赫震矣
先是言事者多不測事至則錯愕搔手皆寒心及子敬
挺身撼鼎鎗犯忌諱而赫赫若此人乃謂天子本神聖
而下無正言即言不當耳觀王給事疏一入而譬之震
霆一擊天地開朗矣于是人皆稱壯偉而權貴人目之
恐其建白益多將及已乃因事出為湖廣按察司知事
轉廣東新會縣知縣縣負海習獮利如訟爭而慍忤多
豪豪皆賄官怵民恣吞噬民畏苦之子敬乃密召縣父

老具列諸豪姓名奸宄狀次第剪艾人不知所出稱神明而盡案諸訟評傳爰書論讞考當無枉始而訟者嘗數百人至是咸輸服稽首稱神明者益衆踰月訟遂清縣固推埋多藏而黃毛鼠者大盜也怙險聚黨數劫掠莫能制予敬乃部民兵嚴號令設方略立擒黃毛鼠散其黨千人戮有罪宥無辜而大盜既誅小偷咸息抱鼓亦益稀矣而瀕縣海口最鉅數決予敬令諸猪載土與石贖既具因多置破艘實土石其中沉之口遂塞壅地

盡為肥田新會稱樂土焉初遷謫者畏嶺海從來久矣
或抑鬱失志自傷或負責不親事廢職乃子敬獨晝夜
竭力為民勞人以此益稱之暇則引博士諸生傳以經
術親授師指而擇其俊人厚廩餼勗其成而邑人白沙
陳先生者儒宗也延禮其裔梓其書使學者知所誦法
在楚則校選文苑詩布天下而苑詩天下不多見見則
苦其繁及校選一出皆踴躍稱善蓋子敬屬任事而以
其間崇文重道孳孳如不遑多此類而楚中諸生吳國

倫者嘗以文投謁一見驚曰此我輩人也當取高第以
文顯既而吳亦發省解第一人為給事數遷謫而與李
于麟王元美稱七才子大略與子敬埒云子敬自新會
轉南京太僕丞人猶以淹屈而終以權貴人啣之言者
受其旨論去焉夫士以挺身誓死披肝胆言天下大事
於前而望風承指之人乘瑕竊擿細微以議其後此巷
伯之所為作也亦可深歎矣然子敬篤孝歸而父母幸
無恙旦夕具甘旨治樽俎奉觴上壽數自暢二大人前

愉愉樂也若不知有罷官者及父歿而哀痛毀瘠殆矣
及母歿而積痛益殆數垂絕若不知有生者尋遂卒哀
哉然子敬卒十年而子宣亦舉進士選吉士授國史編
修繼其父稱才子而國史君奉使還紆道百里枉車轡
而臨子會子間出而駐車解轡者越五日見則欷歔持狀
乞銘予因謂之曰古言求名于朝今予自長安來欲顯
其親名而以臨予左矣然予與王先生遊踰四十六年
而歷歷在心目事本末非外人所具知也予固當銘然

予聞王先生將卜室嘗夢巍樓業業有大槐樹亭亭覆其上旁有指之者曰此公家樹也寤而立起如卜室所則樹果在焉因定築居之今綠槐堂是已夫槐者古三公象王之上世嘗植之且王先生膺先皇帝慎重之選而其志未畢今在予乎夢實命之矣予因論次其事歸焉王先生名交字子敬一字徵久別號龍田晚乃號同齋慈谿德門里人其先羲仲弟璘之實為始祖越二十世而大父琬為廣德判官父容舉進士母周氏配費氏

早卒繼配薛氏封太孺人子男四益國子生娶張氏荃
娶董氏董娶蔡氏荃董皆庠生荃則國史君也娶陳氏

闕

繼娶包氏封孺人女二長適包覲次適顏子望俱

庠生先生生丙辰六月八日卒隆慶庚午九月七日益

等卜以萬歷丁亥十月塋

闕

之原銘曰

高山峩峩誕降厥靈大海湯湯適凝其精精靈鬱結明
哲挺生荷帝之選禁祕是登圖書之府著作之庭珪璋
既琢琬琰以承謂當朝夕式奉準程始同末異獨往難

并舍我偃息趨彼諫爭虎豹九關逆鱗是撓鳳凰千仞
朝陽一鳴志貫金石力撼鼎鑪皇赫斯怒震驚在廷正
國之紀顯主之明如日斯朗如雷以轟凡百有位孰敢
不貞悠悠昊天不鑒孤立羣邪醜正黨黑惡白朝以言
進暮以讒謫人不必用貴其正直言不必多貴其匡國
維此一舉何媿竹帛要觀南海祝融之域九疑微茫蒼
梧可質心既不僞人則何恤澤有可施地又可擇與民
周旋帶星出入諸所建樹亦足暴白彼何為哉復此訛

喻孰取讒人投罕有北賦吊湘纍歌咏巷伯嗟嗟彼蒼
曷其有極惟此王氏將必有興帝召掌夢示以明徵有
人在下欲輔其成再世而起莫之與京相彼槐矣實應
台星禎祥將集符兆先呈用占爾裔當秉國衡安此宅
宓世世其寧

明文海卷四百五十